

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
n.r. Miralem Galijašević, premijer kantona

119

ZENIČKO-DOBOJSKI KANTON	
16 -01- 2017	
02.02	569

117

U Zenici dana 12.01.2017. godine

PREDMET: Prijedlog za pokretanje postupka ocjene ustavnosti pred Ustavnim sudom FBiH

PODNOŠITELJI PRIJEDLOGA: Vijećnici gradskog vijeća Grada Zenice

Poštovani,

Dana 10.01.2017. u Službenim novinama Grada Zenice (Službene novine Grada Zenice broj 1/17) objavljena je Odluka o izmjenama i dopunama Odluke o komunalnim taksama Grada Zenice za koju podnosioci ovog Prijedloga smatraju da je u suprotnosti sa odredbama o jednakosti pred zakonom tj. članom II.2. (1) c) Ustava Federacije Bosne i Hercegovine i sa odredbama o pravu na imovinu tj. članom II-3. k) Ustava Federacije Bosne i Hercegovine.

Naime, članom 4. Odluke o izmjenama i dopunama Odluke o komunalnim taksama Grada Zenice (Službene novine Grada Zenice broj 1/17) predviđena je pod B) GRUPA PRAVNIH LICA I PODUZETNIKA PREMA KRITERIJU AKUMULATIVNOSTI DJELATNOSTI te je predviđena I GRUPA PRAVNIH LICA isključivo za djelatnost „lutrija, igre na sreću, sportske kladionice“- šifra djelatnosti 9,20 sa iznosima plaćanja komunalne takse za jednu istaknutu firmu u rasponu po zonama od 20.000,00 KM do 50.000,00 KM.

Podnosioci prijedloga smatraju da akumulativnost kao i djelatnost firme nije i ne može biti objektivni kriterij za određivanje visine takse na istaknutu firmu što je Ustavni sud FBiH zaključio u brojnim presudama a iz navedenog propisa je vidljivo da je za djelatnost igara na sreću određen najveći iznos komunalne takse u čitavoj Odluci, čime se ova djelatnost na najgrublji način diskriminira.

Općina nije nadležna da oglasi visokoakumulativne djelatnosti niti za to ima relevantne pokazatelje, obzirom da nema uvid u dobit pojedinih uplatnih mjesta (nadležnost FBiH).

Prilikom razmatranja visine takse kao ključni elemenat uzeta je zona u koju se nalazi uplatno mjesto, a što je u većini slučajeva irelevantno, jer u većini slučajeva uplatna mjesta koja se nalaze u I pa čak i II zoni imaju veću dobit od onih u ekstra zoni. Ljudi se ne vole eksponirati u uplatnim mjestima koja su izložena velikoj cirkulaciji ljudi.

Odluka je diskriminatorna i iz razloga što njome nisu obuhvaćene određene djelatnosti koje su daleko akumulativnije od igara na sreću (banke, notari, brokerske kuće, telekom operateri, distributeri nafte itd), a što ide u prilog diskriminatornosti ove odluke.

Razrez takse napravljen po zonama ni u kom slučaju ne može biti relevantan akumulativnosti uplatnih mjesta, a iz razloga što svako uplatno mjesto zbog drugih specifičnosti ima različit prihod, a što se moralo razmotriti prilikom određivanja visine takse.

Naglašavamo da je Ustavni sud Federacije BiH već tri puta proglasio neustavnom Tarifu koja je sastavni dio Odluke o komunalnim taksama Općine Zenica.

Naime, presudama Ustavnog suda F BiH broj: U-26/06 od 19.10.2006.god., U-24/08 od 17.3.2009.god. i U-65/13 od 13.5.2014.god. koje se odnose na Odluku o komunalnim taksama Općine Zenica, sud je utvrdio povredu prava na jednakost pred zakonom jer je kao relevantan kriterij za propisivanje taksi na istaknuti natpis firme nadležno općinsko vijeće propisalo vrstu djelatnosti koju obveznik obavlja.

Na sjednici gradskog vijeća podnosioci ovog Prijedloga su glasali protiv usvajanja sporne Odluke ali su preglasali te je ovo jedina mogućnost da zaštitimo građane grada Zenice koji bi u konačnici morali snositi ogromne štetne posljedice ovakvih nerazumnih odluka.

Svjedoci smo da je Lutrija BiH već zatvorila svoja prodajna mjesta a to možemo očekivati i od ostalih priređivača igara na sreću na koji način će se na Zavodu za zapošljavanje naći preko dvije stotine ljudi koji će kao višak ostvarivati naknade a to naš kanton ne može financijski podnijeti.

Pored gubitka radnih mjesta i zakupodavci, kojima je većini to jedini izvor prihoda, će ostati bez primanja i pomoć će potražiti u Centrima za socijalni rad što svakako nije u interesu ni jednog kantona pa tako ni našega.

U vrijeme kada se moramo boriti protiv parafiskalnih nameta da bismo privukli u naš grad domaće i strane investitore mi šaljemo poruku svim investitorima da ne dolaze u naš grad jer nikad se ne zna kome će pasti na pamet da nekoj djelatnosti nametne enormne iznose taksi na nepostojeće usluge a koje novčane iznose ni jedan investitor ne može ukalkulirati u svoj budžet.

Svjedoci smo da nam mladi ljudi odlaze i da niko ne želi pokrenuti posao u našoj državi a to možemo zahvaliti ovakvim nerazumnim odlukama te je konačno vrijeme da prihvatimo tržišnu ekonomiju i omogućimo djeci da ne napuštaju voljeni grad.

Molimo Vas da uložite napore kako bi se naš prijedlog što prije stavio u proceduru razmatranja ustavnosti čime će se, ukoliko se odluka proglašena neustavnom, šteta po budžet grada Zenice svesti na minimum, a što nam je kao podnosiocima zahtjeva i cilj.

S obzirom da ste Vi, sukladno članu IV.C.10.2.d) Ustava Federacije Bosne i Hercegovine, jedini direktno ovlašteni podnijeti zahtjev Ustavnom sudu FBiH za utvrđivanje ustavnosti propisa koji donose općine i gradovi, molimo vas da podnesete Zahtjev za utvrđivanje usklađenosti Odluke o izmjenama i dopunama Odluke o komunalnim taksama Grada Zenice (Službene novine Grada Zenice broj 1/17) sa odredbama o jednakosti pred zakonom tj. članom II.2. (1) c) Ustava Federacije Bosne i Hercegovine i sa odredbama o pravu na imovinu tj. članom II-3. k) Ustava Federacije Bosne i Hercegovine.

U prilogu dostavljamo prijedlog teksta predmetnog zahtjeva.

Nadamo se da ćete usvojiti naš Prijedlog i pokrenuti predmetni postupak.

S poštovanjem,

Podnosioci Prijedloga:

1. Isak Rusmir

2. Keleštura Mensud